

TEZAUUR LITURGIC
24 SEPTEMBRIE

ACATISTUL
SF. DESPOT
VLADISLAV
AL SERBIEI



MOSCOVA, 2000



Акафист

святому благоверному князю

Владиславу Сербскому

Кондак 1

Избранный Богом в правителя людем сербским, благоверне царю Владиславе, похвальная пение приносим ти, угодниче Христов и молимся всеблагоговейно, твоими молитвами в Православии нас верно утверди, от бед и скорбей свободи и в будущем вечных мук избави, верно зовущих ти: Радуйся, Боговенчаный царю Владиславе, Православия благий ревнителю.

Икос 1

Архангелов и ангелов множество, предстоя Царю Царствующим и Господу господствующим, со умилением взирают на Его о стране Сербской промышленности. Постави бо ты народу ея во главу, царя, блаженнее Владиславе, веру отеческую сохраняти и храмы Божии воздвизати. Тем же

величая твое Богоизбрание, с любовью
поклоняемся тебе зовущее:

Радуйся, от малолетства Христа возлюбивый.

Радуйся, заповеди Его от отец верно в сердце
свое приявший.

Радуйся, теплотою веры Христовой весь
исполнившийся.

Радуйся, чистотою тояжде веры из млада
напоенный.

Радуйся, красотою церковною
вдохновленный.

Радуйся, Духом Святым в Православии
утвержденный.

Радуйся, отцев веру сохранивший и прочия
люди в ней держатися научивый.

Радуйся, храмов и монастырей благий
строителю и о них добрый и изрядный
попечителю.

Радуйся, Боговенчанный царю Владиславе,
Православия благий ревнителю.

Кондак 2

Видя, Владыка Христос душу твою к
приятю Семени Слова Божия, чистотою и

милостынею предуготованную, светом познания
Своего просвети ты, блаженнее Владиславе,
твоими добродетельми благоутробно спасаемых
части сотвори ты общника в Небесном
Царствии, идеже со ангелы поеши Всесвятей
Троице песнь хвалебную: Аллилуиа!

Икос 2

Разум Богопросвященный имея, святыи царю
Владиславе, имже добре проразумел еси
душепагубность зловерий различных, хотящих на
землю твою найти. Ведая же сия, твердое
Православия в стране своей утверди, врагов
злочестивых козни рассыпа. Тем же по долгу
славим ты взывающее:

Радуйся, блаженный сосуде Христова
благоухания.

Радуйся, благое семя Слова Божия,
прозябшее.

Радуйся, плоде благий на древе царей
Сербских.

Радуйся, цвете благовонный на ветви отцев
своих.

Радуйся, верою благою разум себе
благодатный стяжавый.

Радуйся, силою Православия враги Христовы поправый.

Радуйся, Давиду царю в Богопочитании подорожавый.

Радуйся, Богом за то, такожде диадимою царскою венчаный.

Радуйся, Боговенчаный царю Владиславе, Православия благий ревнителю.

Кондак 3

Силою любви Божественныя преисполнен, святе Владиславе, всячески стремился Богу угодить. Взирая на добродетельную жизнь предков своих, множецею старался во устроении храмов Божиих, в них же со всем народом Сербским с благодарением Христу воспеваше: Аллилуиа!

Икос 3

Имея неоскудное стремление к житию Богоугодному, царю Владиславе, премудрому Соломону поревновал в создании храмов благоукрашенных, явился еси воистину преславный зиждитель Дома Господня. О сем восхваляем твое благожелание и хвалящее тя величаем:

Радуйся, Владыки Творца предивный
угодниче.

Радуйся, способный ученик Божественного
Зиждителя.

Радуйся, Дома Божия на земле устроителю.

Радуйся, о сем изрядный попечителю.

Радуйся, царей благонравных подражателю.

Радуйся, их стараний славный ревнителю.

Радуйся, духовенства и монашествующих
всещедрый покровителю.

Радуйся, добродетели пречудный насадителю.

Радуйся, Боговенчаный царю Владиславе,
Православия благий ревнителю.

Кондак 4

Бурею житейских страстей смущаеми,
недоумеем, како достойно воспети твое дивное
житие, блаженнее Владиславе. Ты же кротостию
своею и незлобием, любовью и чистотою, живот
мирен людям своим у Бога испросил, поя Ему
непрестанно: Аллилуиа!

Икос 4

Слышавшее от отцев святых напутственное слово по восхождении твоём на престол Сербский, о чистоте, посте, молитве и всех добродетелях, христианскому царю подобающих, слагал еси сия в сердце твоём, дела вся та исполняти обещаючи. Мы же ведуще твое Богохвальное житие воспеваем ти сице:

Радуйся, ниву сердца твоего добрым семенем засеваемый.

Радуйся, слезами умиления ю оросивый.

Радуйся, яко семя Слова Божия в сердце твоём, яко на земле добрей, укоренися.

Радуйся, воздержанием и молитвою Богу потрудися.

Радуйся, милостынею Творца умиловивший.

Радуйся, нищия и убогия потребами снабдивый.

Радуйся, прозябение страны Сербской, царственною славою на земли и на небеси почтенный.

Радуйся, чистотою духовной дивно украшенный.

Радуйся, Боговенчаный царю Владиславе, Православия благий ревнителю.

Кондак 5

Боготечною звездою явился еси, царю Владиславе, егда царственною одеждою облачился и венец царя Сербского на главу свою от Бога восприял, поя Ему со трепетом: Аллилуиа!

Икос 5

Видевше святыи благоверный царю Владиславе все люди земли Сербския перед собою, подобно отцу чадолюбивому, всех к себе привлекох любовию, и умилением подвизая воспевать и величать тебе тако:

Радуйся, ум твой горе имевый.

Радуйся, сердце твое жилище Святаго Духа соделавый.

Радуйся, Христу Богу человеколюбцу всего себя предавый.

Радуйся, Ему, в смирении подрожавый.

Радуйся, к лику святых Сербских причисленный.

Радуйся, от Бога и небесным венцем почтенный.

Радуйся, яко сиротам и вдовицам, ты еси был отец и питатель.

Радуйся, и нищим, ты еси был милосивый податель и обидимым благий защитниче.

Радуйся, Боговенчаный царю Владиславе, Православия благий ревнителю.

Кондак 6

Проповедником, духоносным апостолом, подорожавше, Владиславе Богомудре, обходил еси грады и веси державы твоя, приводящи елико мощно бе, люди к вере Православней, и научающи их воспевати Единому в Троице славимому Богу: Аллилуиа!

Икос 6

Воссиял еси паче солнца добродетельми твоими во стране Сербской и был еси отрадою для возлюбленных чад церкви Православной, милосердный и досточудный угодниче Христов, блаженнее Владиславе. Сердце же свое на

прошение и нужды приходящих к тебе милостивно открыл еси, прими и нас добрый царю с любовью, к тебе прибегающих и вопиющих сице:

Радуйся, мироположнице Божественная любви.

Радуйся, адаманте крепкий.

Радуйся, честнаго корени святое прозябение.

Радуйся, Симеона мироточиваго предивный правнуче.

Радуйся, сынов его Стефана и Саввы святогорца, архиепископа Сербского, преславный сродниче.

Радуйся, отца твоего Давида, краля Сербского, великая похвало.

Радуйся, святости отцев твоих пречудное вместилище.

Радуйся, их о тебе привеселое радование.

Радуйся, Боговенчанный царю Владиславе, Православия благий ревнителю.

Кондак 7

Коль многими бисеры и камением драгоценным украшен есть венец правды, паче

солнца сияющего образ святого жития твоего. Святой праведный царю Владиславе, ибо подвиг доброго ограждения веры Православной дарова ти Господь, сего ради и мы прибегаем под кров твой, ища спасение, и благодарно о тебе поем Богу: Аллилуиа!

Икос 7

Новаго , тя, царя видим, добродетельми предков украшенного, и в себе вся сия от сосцу матерняя впитавшаго. Наипаче же к старости Богоугодным житием род свой возвеличившаго, и нас научившаго, како должно есть отцев почитать. Тем же яко наставника тя величаем:

Радуйся, заповеди Господни возлюбивый.

Радуйся, от них же ни како же отступивый.

Радуйся, собою пример почитания отцев показавый.

Радуйся, еже от них благая стяжавый.

Радуйся, прадеда святого страну сохранивый.

Радуйся, нищетою духовною Царство Небесное купивый.

Радуйся, Господу и человеком угодивший.

Радуйся, образ истинной мудрости нам явивший.

Радуйся, Боговенчаный царю Владиславе, Православия благий ревнителю.

Кондак 8

Странствия земного течение скончавающе, тепле Господа молил еси, благоверне Владиславе, да не оставит Он землю Сербскую по преставлении твоем во тьме неверия, но да возложит на сердце людем Сербским не оставляти веру Православную, да воспоют Богу: Аллилуиа!

Икос 8

Весь объят был благодатию Божественною, достохвальне Владиславе, мысленными очесы зрел еси скорби народа своего, но уповая на милость Божию, молился за люди Сербския со слезами. Сего ради воспеваем тя сице:

Радуйся, страну свою крепко возлюбивый.

Радуйся, о ней Господа не мало умоливый.

Радуйся, молитвами твоими в скорбех и напастех нас заступающий.

Радуйся, во обстояниих злых отечество свое сохраняющий и нас от врагов избавляющий.

Радуйся, возлюбивших суету мира добродетельным житием превозшедший.

Радуйся, истинную мудрость возлюбивший.

Радуйся, вечное сокровище Богомудрия в Православии обретший.

Радуйся, преданностию воле Божией ангелы с человеки удививший.

Радуйся, Боговенчаный царю Владиславе, Православия благий ревнителю.

Кондак 9

Всяких добродетелей исполнен бывше, Владиславе всечестне, с молитвою во устех, предал еси дух твой в руци Божии. Иже всели ты в Небесной обители и сопричте лику угодников Своих. Тем же испроси и нам у Господа мирную христианскую кончину, да предадим души наша в руци Христа Бога нашего, поюще Тому хвалебную песнь: Аллилуиа!

Икос 9

Ветия многовещанья не могут достойно восхвалити ты, Владиславе Богомудре, како ты

познал еси тщету исповедания латинского и прочих учений еретических, Православного же верования взыскал еси. И якоже, преподобный Симеон, первый краль Сербский защищал народ свой от влияния иноплеменнаго, да тобою на путь правый наставляеми, взываем ти радостно:

Радуйся, добрыми твоими делы и правым ума и сердца изволением приуготовивший себе в жилище Божественныя благодати.

Радуйся, яко Дух Святый учитель тебе бысть к познанию Христа Сына Божия.

Радуйся, совершенную покорность воле Божией показавший.

Радуйся, яко умудри тя Господь, честь царскую, богатство и славу сочитати со смирением христианским.

Радуйся, яко сим образом яве нам показавый, яко блага земная не суть препятие души Боголюбивей к достижению благ небесных.

Радуйся, предивный поборниче веры Христовы.

Радуйся, поточе сладости, напоивающий нас водою благочестия.

Радуйся, потребителю злых обычаев и суеверий.

Радуйся, Боговенчаный царю Владиславе, Православия благий ревнителю.

Кондак 10

Спастися всем преискренне желая, молишися за ны горе у Престола Господня, избранник Христов, блаженнее Владиславе. Яко же твоими молитвами пособиши нам в странствовании многотрудном земнаго жития, еже в покаянии и благочестии скончати. Яко облече тя Господь Божественною силою, да обратиши вся неверныя и научиши всех со умилением сердец воспевати Творцу в Троице: Аллилуиа!

Икос 10

Стена явился еси стране твоей несокрушимая, богомудрый и необоримый защитниче всем призывающим тя, зане тако благоволи о тебе небеси и земли Творец Господь, прославляя угодника своего. Яко же при гробнице твоей совершашися знамения чудесы, и изыде молва по всей стране, и понуди краля Уроша торжественно обрести нетленное тело твое для поклонения христианом. Мы же из

глубины сердца с упованием глаголем ти
молитвенниче наш, пения таковая:

Радуйся, молитвенник наш пред Богом
теплый.

Радуйся, яко изыде по всей стране вещание о
чудесех твоих.

Радуйся, яко успение твое торжествует
Православная церковь.

Радуйся, прославленный Богом на небеси и
на земли.

Радуйся, явлением мощей твоих, церковь
Сербскую возвеселивший.

Радуйся, чтущее память твою и мы ныне
восхваляем Господа.

Радуйся, градом Сербским похвало и
утверждение.

Радуйся, яко тобою дивен Бог во святых
своих является.

Радуйся, Боговенчаный царю Владиславе,
Православия благий ревнителю.

Кондак 11

Пение всеумиленное принесл еси Пресвятей
Троице, святее Владиславе, умом и делом до

конца своей жизни Триипостасного Бога возлюбивши. Приими же от прославляющих тя умиленное пение и не презри гласа нашего, к тебе бо в напастех и скорбех прибегаем и на твое предстательство уповающе, зовем Богу: Аллилуиа!

Икос 11

Трисиянным светом осияваем, со всеми святыми предстоиши ныне на небеси Престолу Царя царствующих, Владиславе всеблаженне, и от туду, яко светозарное светило, просвещаеши всю страну Сербскую, разгоняючи мрак заблуждений и показуючи путь к истинному просвещению к небесному блаженству. Сего ради, прославляюще тя, глаголем:

Радуйся, путеводителю, правую стезю к вечному спасению нам показующий.

Радуйся, мощный споспешник и укрепитель проповедников Православныя веры.

Радуйся, покровитель наставников, благотрудящихся на пользу общую.

Радуйся, крамолы и раздоров искоренителю.

Радуйся, всех обидимых и не праведно гонимых заступниче.

Радуйся, скорбящих скорый утешитель.

Радуйся, болящих целитель.

Радуйся, людям помощь молитвами твоими от Бога подающий.

Радуйся, Боговенчанный царю Владиславе, Православия благий ревнителю.

Кондак 12

Благодать Пресвятаго Духа испроси нам, заступниче честный, от Всещедрого Спаса Христа, вразумляющую и укрепляющую нас во спасении. Да не бесплодно будет в нас семя святых Христовы веры, но да прозябнет и плод сотворит, им же бы возможи нам питати души наша в будущем веце, идеже вси святии поют Богу: Аллилуиа!

Икос 12

Поюще твоя многая и преславная благодеяния, святе Владиславе, явленная не токмо людям земли Сербския, но и прочим, по всюду сие тебе зовущим:

Радуйся, в сожителство ангельских чинов и святых любезно приятый.

Радуйся, собору царей святых сопричтенный.

Радуйся, с лики избранных Божиих в чертог небесный вселивыйся.

Радуйся, золотая кадильнице, фимиам молитвы о нас Богу приносящий.

Радуйся, лицезрением небесных, вечное блаженство вкушающий.

Радуйся, с благоверными цари и князи славимый.

Радуйся, народом Сербским и всеми Православными величаемый.

Радуйся, чудес Христовых сокровище.

Радуйся, Боговенчаный царю Владиславе, Православия благий ревнителю.

Кондак 13

О, святой благоверный царю Владиславе, прими милостивно от нас хвалебное пение сие о всех, яже тобою воздаде нам Господь. И моли Всеблагаго Бога умножити милость Свою на ны и на роды родов наших. Утвердити ны в Православии и благочестии. Сохранити же от всех скорбей и напастей, бед и зол, да сподобимся с тобою во веки воспевати Богу: Аллилуиа! Аллилуиа! Аллилуиа!

Молитва

О, святой и славный угодниче Христов, царю Владиславе! Скорый помощниче и теплый заступниче с верою притекающих к тебе. Предстоя со дерзновением Небесному Царю, испроси у Него прощение согрешений наших. И о еже избавиться нам от всегубительных язвы, труса, потопа, огня, меча, и вечных казни. Моли Благодать Его, еже ущедрити всякую страну христианскую. Исходатайствуй у Господа на враги победу и одаление, всему же миру тишину, к Православию обращение, твердость в вере и преспеяние во благочестии. Нам же, чтущим память твою, испроси благодатное укрепление в молитве и делах благих, да благоугодное Владыке нашему Христу Богу зде творяще, сподобимся молитвами твоими, блажене, наследовати Царство Небесное, для вечного прославления Его со Отцем и Святым Духом во веки веков. Аминь!



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

†

НОВОЕ
НЕБО